

四庫全書

集部

欽定四庫全書

參寥子詩集卷六

宋 釋道潛 撰

寄王元均奉議昆仲

崇文學士後二子皆翹翹異哉荆山麓產此英瓊瑶娑  
娑翰墨場文彩相蔚饒頃我未知識寸心徒搖搖前年廣  
陵城會合如有招名都冠淮海氣象古所豪林園若  
綦置佳處遺塵囂良辰肯浪負杖策同嬉遨清譚落  
玉塵疊疊如聞韶歲晏樂未闋離羣復蕭蕭扁舟眇一

葉出沒隨江潮雲山列千里廬霍尤岿嶢孤懷喜自放  
跨躒豈憚勞所嗟無二陸相我吟風騷

廬山雜興四首

溪石斑斑舞碎光巖花冉冉馥幽香當時吳猛逢山處  
金闕橫開在上方

隔崖垂蔓蔚蒼蒼隱見莓苔舊石牀定有飛仙集其下  
月明時復度笙簧

高松夾道夕陽明抱葉風蟬引細聲勸爾行人聊駐足

出山無物更能清

星渚江邊月已生  
石橋歸路夜崢嶸  
西風散入松千樹  
翻覆銀河秋浪聲

宿回峰院寄黃擇中察院

秋堂立四壁  
物色夜蕭然  
藜床抱孤影  
起坐未成眠  
層飈激高梧  
萬動接虛聲  
感至情先謝  
理冥神預領  
銅壺漏未央  
扶杖起彷徨  
方塘溢繁荇  
冷月下疎篁  
躑躅步空除  
風帶裊霜裾  
泯余契幽獨  
悵子隔川途  
短短袖中

書明發欲誰寄梁上木鯉魚儻能將此意古亦有相思  
吾今何所遺浩歌望雲水期子與同歸

寄史院王正仲曾子開二學士

太史久不作千秋想前人朝廷理故事董職須絕倫青  
錢兩學士班馬相並隣婆娑金閨中婉孌得所親學海  
揚波瀾詞林藹芳春青編炳金牘允顯無曲陳翹翹茂  
令德諤諤規縉紳玉堂行見躋清切凌紫宸野人蹈江  
海放浪無邊垠相思邈何許共此青桂輪

寄東坡昆仲

江南十月天未霜木梢冉冉猶青蒼烟沙篴竹媚兩岸  
亭午氣候如春陽吳檣楚柂自紛擾花鴨鷗鷖殊未忙  
深灣野浦望不劇葦間隱隱聞漁榔黃昏無雲桂魄滿  
一川秀色傾銀潢何人隔岸弄長笛吹風渡水聲悲涼  
蘭臺故人天一方美景樂事誰相將船窓欹枕夜未央  
沓沓孤雲空飛揚

梅花寄章仲釋法曹

蕙死蘭枯驚歲晏玉蕤初發照溪寒從來吳苑牆頭見  
不似匡廬谷底看月浸繁枝香冉冉露浮紅萼曉團團  
叅軍詩格追何遜應笑山人自考槃

梅花 三首

雲英粲粲笑相重結子能叅鼎鼎功  
茜杏妖桃綠格俗  
含芳不得與君同

造化推排力自強非關著意占年芳  
繁霜亂雪虛埋沒  
傾國人知有此香

杖頭灼灼爛生光  
弄日驕寒倚短牆  
欲賦却慙無妙手  
使人操筆憶何郎

寄福州太守孫莘老龍圖

公子自淮海弱不游羣  
兒良哉白玉質  
炯炯無磷緇  
澡身以道德  
餘棄為文詞  
端能處庠序  
邈有孔孟姿  
一朝擅高名  
卓然動京師  
餘輝耀天末  
熒熒如斗箕  
校讐云閣中  
精義無叅差  
同時鵷鷺行  
半已翔鳳池  
兩登諫官室  
抗疏犯天威  
揚舲去江海  
曠歲成流離  
朱輪擁蒼雪



五馬從合肥編氓仰遺愛墮泪存豐碑歸來遘風樹憔悴不展眉藉苦一室中四壁無重幃南隣有古刹而我方棲遲杖藜時過公泣血聞嗟咨從容勸我坐一飯常共為蒸蒸沸古鼎藪藪投園葵客來慵應門客去知為誰禮喪事云既始領吳門麾瓶盂走梁苑恨不相追隨秋風亟東下旌旆俄已暝浮川與遵陸多病亦云疲七閩富名山空翠相逶迤在昔慕仁智於今慰遨嬉棠陰想初坐吏業紛交馳庖刀一為解往往無子遺麥秋薦

丹實梅雨裁纖絳黃金燕佳客柔指鳴哀絲萬事不芥  
蒂羨公能自怡

聞子由舟及南昌以寄之

高安居士實人龍五載南遷道愈豐域外城池剛自守  
人間膏火詎能攻屢嗟江海星霜隔行喜雲林笑語同  
五老峰前佳氣象待君一醉吐長虹

和子由彭蠡湖遇風雪

夫子經濟材妙質靜而默當年大廷中如堵觀射策雄

哉賢父兄一日並輝赫勲業望夔龍寧論二千石扶搖  
各不惜因此垂天翼五載貶筠陽區區校尋尺鹽車厄  
驥足道路行歎惜脫身當歲晏行李唯典籍高懷久達  
觀不見憔悴色悠悠東下船晚次彭蠡側江風忽崩騰  
江水翻且黑飄風斷黃蘆落雁委砂磧鷺毛飛雪片滿  
野來無極龍驤飛萬斛欲進不可得淹留向汀灣蕭瑟  
日將夕黃昏勢漸壯夜半已堆積魚龍亦悲嘯凜氣增  
几席青燈冷不眠坐漱元和液危檣翻曉鴉霽日動窓

隙窳幃望廬山萬仞絕寸碧茫茫銀世界蕩蕩月閨城  
順流復前趨百里俄頃刻暫停篙櫓喧却着登山屐五  
老笑相迎千巖委主壁紛紛林下士洗眼與一識松門  
共邀迂香霧浮冪冪相將擁寒爐軟語同夙昔堂堂  
赤眼師既往有遺跡惇然宰堵波縹緲根石壁清晨陪  
拄杖緩步躡山肋徘徊憇蒼嶺左右抗松櫪猿獠侮僮  
僕上下或戲劇巴僧眉半雪解后語鄉國却返朱砂峯  
招提更岑寂中藏李氏書盛事誇絕特東坡老居士通

亦有題墨一覽慰君心都忘遠行役

寄俞秀老清老二居士

三首

風溪雲巘雪消初鳥變春聲滿屋除安得故人同蠟屐  
石櫟斜日看遊魚

落星江水接天流花絮飛時暮雨收波底鯉魚東去否  
尺書煩汝到揚州

慚愧君家好弟兄風流宜與晉人并青鞋布襪能從我  
共入廬山深處行

廬山道中懷子瞻

谷口晴雲散曉光  
鳥聲呼我渡橫塘  
輕明獨愛桃花靜  
撩亂偏嫌柳絮狂  
處處叢祠起簫鼓  
家家籬落動耕桑  
去年今日東坡路  
拄杖相將探海棠

酬周亭叔主簿見贈

廬山百里蟠穹蒼  
絕頂陰雲常下覆  
晴日天風忽掃除  
翠壁千層開錦繡  
我來廬山初得君  
愛君面有廬山秀  
長篇險韻使我驚  
忽獲風流雲散後  
氣味清新湍牙頰

如入洞庭嘗橘柚梅子如錢柳絮飛杜鵑哀號山雨晝  
念君明當京邑行馬蹄蹴踏春泥縐黃陂新息道路迫  
墊飯藜羹須強喫天街到日夏漸熱車轂如摩汗如溜  
丈夫功名非苟取勸子未用輕藍綬山中五月早歸來  
澗底清泠當共漱

訪荆國王公

三首

浩蕩經綸志已行北山歸老思冥冥可妨渡水穿雲客  
拄杖芒屨到戶庭

博辯舊聞輕孟子談經早不愧揚雄惠能伎倆元無有  
還許從容廣座中

若嫌榮祿早收身歸與漁樵共隱淪白下門西山迤邐  
興來長是岸烏巾

謁上竺觀音大士

十年江海去飄然魂夢長依鷺嶺邊月地雲堦重到處  
殷勤稽首白衣仙

次韻元翁見寄



十載離羣歎渺茫  
良辰無地可相羊  
何時却入蓮花社  
軟語重焚柏子香  
藹藹春風搖几席  
紛紛啼鳥滿林塘  
欲憑海燕傳消息  
徑入君家舊屋梁

病中四絕句呈劉景文左藏

一室寥寥北嶺隈  
午窓孤枕夢初回  
無端自是風驚竹  
錯認旁人問疾來

西風薄木晚颼颼  
古屋無人夜更幽  
童子未閑煎藥火  
隔窓燈影漫悠悠

高梧挂月照床頭  
聒砌寒蛩似怨秋  
我病尚能安靜默  
爾曹無事苦啁啾

竹裏鳴鴉曉欲飛  
遼寒疎箔望朝暉  
莫嫌山色經秋瘦  
我亦秋來減帶圍

余初入智果院

蕪翰林率賓客相送者  
十六人各賦詩一章

泰山屹天下四海同仰止  
我公命世英突兀等於足  
中廓秋漢皎絕微雲滓  
當年事危言軒冕如脫屣  
正貴知我希寧慚不吾以  
風雲果再符六翮挑空起  
一昨厭承

明抗章求迺遷餘杭右雄藩比屋富生齒立談政即  
成興不負山水雍容敦末契訪我頑且鄙大旆輝松門  
禽猿亦驚喜森森門下士左右燦朱履使君道德姿主  
角非所恃軟語如春風薰然著桃李今朝真勝事千載  
足遺美安得筆如椽磨崖為公紀

龍井辯才老師新亭初成有詩呈府帥翰林俾余  
繼和輒次元韻

遠公吾家傑道妙非壺邱德傾龍象侶貌蓋江湖秋平

生經綸學不為名相留滔滔若懸瀑下注萬丈湫昔年  
謝講事衆輓不轉頭剗心老巖穴百念本不浮東南多  
望士唯見此老優翰林天下公方外寔輩流旌旗虎溪  
路竟日泉石游衆生病未已師意可忘憂

次韻蘓仲豫承務寄伯達推官

蘓子真豪英氣貌嚴且重幼無兒女姿嗜好百不動唯  
餘讀書事乃與古人共文章造深淳詞力寬不縱樂哉  
賢父兄道義日相從昨朝西湖外目極孤鴻送高帆去

百里山水之吟弄作詩投置郵但述鴿原夢

辨才生日

像未真風恐不傳故生豪傑為人天慈航橫截三千界  
法雨均沾四十年獨鶴精神秋始健長松根節老彌堅  
莫將有物觀無象唾霧氷輪處處圓

寄題鮮願堂

道人還家今幾時築室構堂名鮮願尺書三遣要我賦  
我獨老矣何能為塵埃筆硯試料理肝肺枯槁源不滋

為君苦思強抽軋詞慳氣迫無逶迤東陽自古號多士  
文采風流世有之堂成往往獻佳句羅列四壁皆瑰奇  
譬如釣天已九奏安用擊筑鳴參差又如玉石厭方丈  
葵藿欲進旁必嗤他年但約訪君去借君几席聊偃歌  
堂中插架足書史牙籤玉軸當細窺

送仲豫叔黨二承務赴試春闈

炯炯雙黃鵠雍容振羽儀風高辭澤國歲莫及天池文  
彩非凡近周旋競陸離明年翺集處九萬是君期

同蘓文饒主簿西湖夜泛

鳳唼山頭暮靄空  
月娥飛出廣寒宮  
初登桂楫橫湖去  
似覺銀河有路通

掠草飛螢星點點  
眠沙宿鷺玉叢叢  
從來江捻文才妙  
請付毫端刻畫中

酬錢塘宰王昭叔朝奉

令尹胸中萬斛寬  
簿書堆案豈相關  
揮毫手過庖刀疾  
訪勝心同止水閑  
竹日映簷光破碎  
雪雲開嶺翠連環

自嗟不及庄山遠坐對淵明祇愧顏

景文寵示四月十七日翰林公過龍山真覺院賞  
枇杷五言一章景文已和之復使余繼其後

脫畧今山簡能吟舊子春偶因尋勝出不為採芳人紅  
紫千葩盡甘酸萬顆新江雲浮翠壁靄靄散魚鱗

夏夜懷景文路分

層攔霽晚雨餘響猶滴瀝天風吹浮雲入夜已無迹月  
波泛修竹灩灩流几席蘭膏滅衆炬涼氣滿四壁蕙烟



擢銅爐暗觸鼻端息藜牀但危坐萬想本空寂肺肝既  
冷然紈扇亦暫釋將軍不吾期樂事空自得願言賦長  
謠為我記此夕

次韻景文會朱克仁大夫魏敏中朝奉於望湖樓  
長句

高樓冠浮雲下瞰百頃湖清漪照兩岸秀色含菰蒲騷  
人富筆力領畧驚須臾短長隨萬象肯議鶴與鳬二客  
各英妙溫溫右為徒從公文字飲所樂非歌呼酒酣挹諸

山高下如迎趨藍輿復迤邐遠訪飛來孤炎蒸近亭午  
天地如大爐石泉飲吾廬快意猶過屠松門徹九里始  
見靈山隅佳名自開皇籍甚聞中區幽芳不時艷地腴  
乃滋濡招提數四海雄觀宜且無歸途憩壽星寒碧森  
萬株蕭騷聒衆響孰辨笙與竽檠眸矚新榜蔚蔚氣  
自殊將軍戀清絕歡容頽玉壺道人烹露芽滿盃浮雲  
腴儻無方外姿未可同此娛

寒食日蘓翰林同馬仲玉提刑過訪有詩示怡然

并余余次韻

使君薄珪組富貴良易足一麾下東南千里爭拭目援  
毫賦山水詞力瀉溪谷賸遊便杖履聒耳厭絲竹西湖破  
春冰曉漲翻晴綠相將二使輶導從還屏逐後先度  
巖壑頽顏追鸞鵠樂事殊未央酒行宜局促風流俄醉  
舞坐客瞻顏玉嵇阮真達生秦唐謾歌哭斜陽絕湖去  
兩槳凌波速却尋元龍居隱隱隔喬木到門呼主人展  
畫滿高屋夕鼓來遠近雨聲飄斷續籃輿入城市夾道

開燈燭盛事在餘杭他年見圖錄



參寥子詩集卷六

欽定四庫全書

集部

參寥子詩集卷

九八七

詳校官庶吉士臣汪彥博

侍讀臣孫球覆勘

覆校官中書臣田尹衡

校對官中書臣王家賓

謄錄監生臣陳炳

欽定四庫全書

參寥子詩集卷七

宋

釋道潛撰

別蘇翰林

四海窺人物其誰似我公  
論文容末契許國見深衷  
漸遠吳天月行披禁殿風  
王堂清夜夢解后過江東

送景文

交遊盡四海厚我乃無幾  
劉侯軀七尺堂堂信英偉  
中剛冷如鉄萬事肯料理  
相逢傾蓋餘眷眷極終始  
東南

久徹警將領用儒士三年湖上遊屬得陪履齒長謠傲  
雲壑草木俱披靡詞鋒剉萬象搜索泣山鬼珠璣溢錦  
囊所得真富矣軒冕本倘來功名徒爾耳一屢聞已卜  
視此猶脫屣歲晚匡廬山高棲踵前軌

贈太守林子中待制

拭目除書下九天邦人爭賀使君賢風流謝守宣城日  
愷悌龔公渤海年終作鹽梅均鼎鼐且憑觴豆樂山川  
一門棣萼登臺省盛事駸駸海內傳



四照閣奉陪辯才老師夜坐懷少游學士

猿鳥投林已寂然芭蕉過雨小樓前雲依絕壁中間破  
月自遙峰缺處圓照坐不須紅蠟炬可人唯有蕙爐烟  
校讐御府圖書客疇昔還同此夜禪

贈天竺聰道人

完完明月珠蓄彼萬丈淵徑寸不可覩餘輝媚清川道  
人寔有道膠口默不傳心閒氣自和眉宇常藹然邦人  
昔致師欲以居法筵文彩動帥府禮數端亦虔冥鴻避

網羅矯翼從高騫  
竭來靈山隅  
圓蒲味深禪  
盛德不自顯  
與物同周旋  
兒曹恃文采  
毫末爭醜妍  
相逢廣坐間  
肯顧斯人賢  
茫茫大化中  
浮名暫腥膻  
吾知道人意  
反汝生哀憐

送僧遊天台

梅邊孤起碧千尋  
俯仰應酬壯觀心  
峭壁斷崖當歲晏  
冷雲疎雪上衣襟  
論懷此日能傾倒  
尺素他時嗣好音  
摘勝窮幽吾老矣  
杖藜無復伴登臨

覽黃子理詩卷

六載南官何所營  
百篇翻覆見高情  
霜鷗露鵠元非俗  
雪竹風松本自清  
俊逸固宜凌鮑照  
優游真已逼淵明  
微言會有知君者  
漫擬鍾嶸試一評

梅花寄汝陰蘓太守

湖山搖落歲方悲  
又見梅花破玉蕤  
一樹輕明侵曉岸  
數枝清瘦耿疎籬  
良辰易失空回首  
習氣難忘尚有詩  
所向皆公舊題墨  
肯辜魚鳥却來期

次韻陳敏善秀才見過

投老形骸真木偶，水飲巖棲聊自守。世事浮雲日變遷，  
我亦何心預臧否。故人新自廣陵來，問我詩囊近何有。  
吾言淡薄非橄欖，縱可咀嚼聊能久。且開窓戶話平生，  
湖色山光翠相糾。烘簷暖日氣味好，相對蒲團復支肘。  
愛君年少擅才華，詩律清妍無可醜。却愁征棹促君還，  
空聽陽關詞一首。

都僧正慈大師挽詞

領袖吾家事由來二十春虛懷能應物真氣肯隨人逝

水流方遠臨池墨尚新聲聞雙樹子不見葉間身

育王山大

覺禪師以羅漢木贈蕪翰林蕪反以贈師凡植二十  
葉間生青如比丘形謂之羅漢木師嘗指此語余曰吾  
不復見此羅漢之生也故及之

平生輕長物身世等鴻毛譽出東南早人驚節義高玩  
奇惟水石結客盡英豪來往元無迹情鍾漫鬱陶

伏枕時無幾臨分若故常寸心能炯炯去路豈茫茫車  
馬門猶盛芝蘭室更香獨餘庭下竹冷韻起悲涼

次韻吳承老推官觀開西湖

偉人謀議不求多事定紛紛自唯阿盡放龜魚還渌淨

肯容蕭葦障前坡一朝美事誰能紀百尺蒼崖尚可磨

天上列星當亦喜月明時下浴清波

列星事出教中

都僧正既闕子中待制欲余補其位輒辭以小詩

遂獲免

佩德懷恩豈易陳自嗟麋鹿性難馴流年日月無多子

乞取山林放曠身

送子中待制 三首

翹翹孤鳳凰安巢本阿閣偶來依澤國歸興遂淹泊江山  
迫歲華草木正搖落霜空肅萬里纖翳無處着翻然整  
羽儀一舉在寥廓

南山有佳木秀色何歲蕤封植不記年落落今百圍盤  
根雖自固烈風無時吹匠手營大厦衆材得施為偉哉  
梁棟姿取用不可遲

平生長樂公聲華越三紀文章兩京齊學術游夏比螭

頭足未安符竹已屢徙聯翩開幙府爛熳樹桃李鋒車  
入帝鄉天馬行九軌周旋有程度駑駕駕安足擬

曉發苕溪將次徑山呈通判廖明畧學士

明星耿耿出天東結束籃輿伴我公藹藹梅香侵曉陌  
斑斑旗脚轉春風勝游此日塵埃外回首他年夢寐中  
絕景小詩難壯觀當年醉筆吐長虹

次韻王行甫奉議湖上晚歸遇雨

妙齡公子嗜遨嬉永日湖山未肯歸酒幟曉人應慣識



花枝拂帽不須揮輕紈細綺來何處青蓋朱輪去似飛  
向晚薄雷催急雨清寒無奈襲裳衣

同曾仲錫通判遊天竺諸山

煌煌世胄餘夫子非碌碌由腹有詩書所以能拔俗得  
官本河朔瓜期未云促扁舟下東南逸興追鴻鵠遇勝  
即徜徉風飡魚露宿嗟余偶傾蓋一笑外羈束杖策每  
過從相携訪山谷春風披鮮榮繡錯出林麓松門有時  
盡幽興無斷續崖轉聞鐘聲林疎見華屋銜山餘落景

歸路猶躑躅誰云鄴下歡往事不可復吾曹二三子所  
樂亦云足願公紀新詩一一能見錄船頭行北歸囊篋有  
美玉塵埃京洛人示與洗心目

次韻劉韋孟主簿湖上

劉郎詞筆過康成詠遍湖山草木情祿隱太平真樂事  
莫思神武挂冠纓

中流出沒一舟虛緩櫂長謠彼自如聞說古來江海上  
達人多半寄樵漁

老對如雲既卷除風瀾百頃翠紆餘竒探險取各爭賦  
誰復能名造物初

遊莒溪道場山

東風吹雨過城闔日照河隄柳映津兩檠差差搖燕尾  
千山漠漠散魚鱗長綠絕境關幽夢尚喜茲游及暮春  
蘭蕙未衰桃李在蜂喧鳥咽莫愁人

夏夜

松室開孤定褰幃納夜涼嬋娟依翠竹無語過東牆

送蘭花與毛正仲運使

幽姿冷艷匪妖嬈  
曾伴靈均賦楚騷  
今日移根庭下植  
可無佳句與揮毫

從來託迹喜深林  
顯晦那求世所聞  
偶至華堂奉君子  
不隨桃李鬪氤氲

夏日竹閣

沉水擢烟青  
繚繞風篁傳韻冷  
蕭騷楚山竹  
簟琉璃滑  
卧看炎雲檻外高

送李仲益赴襄陽幕

襄陽古名都雄觀壓荆楚醉公誇文詞風物粲可數嗟  
余未歷覽彷彿已如覩人生游宦間得此亦佳遇李俊  
妙天姿文行兩自負少年志真鴻千里輕一舉天風不  
借便造物暫淹阻既無負郭田黽勉依幕府賢哉彼方  
伯脫略高韻度寧俾簿書役朱墨事朝莫爽氣對西山  
清譚共搏俎試問鹿門翁遺蹤今在否

訪勤上人

斷橋蒼壁倚溪斜，赤葉楓林噪晚鴉。  
可怕嶺雲埋徑路，會尋流水到君家。

荅柯山曉上人

風騷古人事而我，豈所長兒曹嗜章句。  
餘習未易忘根源，本無有真若夏潦潢。  
道人氣拔俗，吾黨稱俊良。  
十年依叢林，實以道自將。  
禪餘喜賦咏，妙語逾珪璋。  
世眼獨未識，深叢閔孤芳。  
鋒錐必穎脫，安肯久處囊。  
子宜力自勉，聲問終揚揚。  
吾言豈知子，老大殊荒唐。

送俞伯謨宣德赴辟成都

我生落拓如虛舟，萬里江湖隨演漾。君今祿仕亦我同，  
南北悠悠無定向。故鄉回首海東頭，兄弟十年官塞上。  
才高質美衆所奇，杞梓豫章非冗冗。長辟書交飛上廟堂，  
肯使須臾事閑曠。泰山崢嶸塹戎虜，自古征人愁悵望。  
劍門棧閣天下危，去馬來車魂欲喪。羨君年少勇攀躋，  
足躡青冥身益壯。舊遊陳迹想依然，感物懷親情獨愴。  
伯謨先公待制  
嘗為成都漕

次韻文饒同自龍井出資國度泛舟以歸北山

踞虎奔犀列萬形，竒觀直已過南屏。  
縈雲細路杳無盡，落石飛泉靜有聲。  
十里平湖初卷葑，一天秋色共揚舲。  
停橈共過孤山寺，寂寂林僧半掩扃。

陪司馬仲才節推諸君遊天竺得青字

西郊久不雨，草木無餘青。  
薄雲弄秋暉，山色時晦冥。  
超然五詞客，文采披華星。  
聯翩過吾廬，車蓋紛滿庭。  
相携訪靈鷲，細路通巖扃。  
攀翻幽桂叢，衣襟襲芳馨。  
絕境異



人世吾詩豈能名諸豪追鄴下妙語逾瓊英願言一揮  
寫樂事良難并高空墮海日歸驂尚能停

呈丞相章公

時提舉  
洞霄

大滌僊翁謝往還蕭然几席奉清閑胸中舊已吞雲夢  
人望從來重泰山書到鍾王方絕學文非典誥不須攀  
名言一一皆公語他日親聞廣坐間

過定林謁荆公畫像

古木蒼藤一徑纏我公疇昔屢回旋蕭蕭屋底瞻遺像

傑氣英姿尚凜然

壁間千字走龍蛇好事何人護絳紗一讀已能生感慨  
暮簷蕭瑟更啼鴉

次韻曾子開侍郎話別

二紀浮游踏世塵賢愚了了見情真行藏不昧如公少  
細聽名言實可人

抗論儀曹肯折旋一麾江海去飄然他時開府餘杭郡  
來酌吾廬石縫泉

書夢寄妙懿

妙思堂深路屈盤  
夜來魂夢忽躋攀  
道人開戶相迎處  
宛在修篁翠霧間

觀恭師詩書以二絕勉之

吾鄉英秀頗能文  
子復區區慕碧雲  
請用三多為祖式  
他時自與古人羣

論書當亦似論兵  
軍律非嚴事不成  
行伍會須同比櫛  
出奇方可語縱橫

過鍾山尋俞清老不遇

霜風薄木韻含悲  
歲晚尋君失後期  
夜鶴曉猿驚怨歇  
草堂人去已多時

次韻劉伯昌長官見贈

劉侯詩格殆天全  
初得西湖紀勝篇  
錦繡為腸供麗藻  
鯨鯢作氣吸長川  
靜依北牖開樽俎  
醉掃寒梢雜雨烟  
歲晚扁舟東去疾  
喜君高調重遷延

次韻法真禪師送曾敬之宣德昆仲

昔與乃翁相遇年始知有子生且賢爾來雙榦已爭秀  
屹屹欲上參高天昨朝較藝偶不售他日奏賦聞甘泉  
方令廟堂喜人物收拾萬彙歸陶甄裒蹄麟趾終一出  
輝映左右無餘妍肯學孟生誇得意一日走遍春風前  
嗟余投老隱巖谷形若槁木心灰然扁舟追子僅千里  
彷彿夜夢遙相傳西湖風物行歲晏歸賦梅花趁臘先  
送文惠師還金華

脫略紛華自妙年秉心端喜事金僊終期象馭超三界

不羨鵬程越九天  
考疏窮經心尚壯  
依仁據德節尤堅  
秋風陡起庭闈念  
聊寄修江一葉船

證師聖可桐虛齋

吾聞嶧山桐猗猗排秀幹  
栖鸞宿鳳信所竒  
衆木紛紛何足算  
嗚呼天相彼質復虛  
彼心故其聲之隱也無聞  
其動也無留有扣而鳴  
體佚而休  
嘉上人之妙齡兮無適俗之卑韻  
剛有擬于斯桐兮  
廓中虛以受訓  
異速成之朝榮兮  
培益厚而日敏  
悼像禾之寥寥兮  
蹇我道之

不振續芳塵于祖席兮他日非桐虛上人者而復誰何  
哉

規師方外停雲齋

上人少脫畧出處非拘囚停雲倚空端舒卷良自由縱  
之千丈強歛附拳石幽超遙宇宙間孰與斯人儔銘詩  
善摹寫居士亦風流

卜居智果方外以詩見寄次韻奉酬

偶來湖上緝衡門桐長修柯竹有孫引策每從佳處去

碧雲橋下是西村

青燈殘篆夜寥寥門外秋風振葦蕭慚高人能見憶  
為余西望立溪橋

次韻周開祖大夫泛湖見訪

漾漾清漪十里間畫船人似鏡中安雨催菡萏幽香發  
風觸葡萄細浪寒高岸烏紗來靜院倒揮白羽傍層欄  
吟毫所遇無遺景天乞詞源比海寬

參寥子詩集卷七



欽定四庫全書

參寥子詩集卷八

宋 釋道潛 撰

次韻才仲試院夢中夢事見寄

夢入秋山知幾層霜風吹骨正稜稜蒼崖犖确難安足

自說徒余授杖藤

事見才仲叙中

朱甍碧瓦礙雲浮共躡層梯最上頭一餉闌干變風雨  
凜然毛髮便驚秋

怪獸胡為出巨津昂然激水忽翻身魚龍鼉黿何妨事

莫作風波謾恐人

一川修竹映疎花川上時聞響釣車似到秦人種桃處  
誰知夢斷却還家

崖根鳥窰已先嘗從此知君鬢不霜應笑吾曹事枯槁  
山中危坐獨休糧

贈吳子野先生

麻田老仙心炯炯少有高風慕箕穎枕流漱石三十年  
眸子瞭焉神更靜忽然杖策海上来至人道妙同塵埃

達官貴侯競招致往無所欲誰嫌猜邇來一志從吾黨  
跡與孤雲共天壤曹溪有路更攀躋徑躡崑盧高頂上  
子野將出家事  
見東坡詩中

送庠上人

點檢行裝拂與巾灑然輕別故山春  
家家門底長安道  
舉目何須更問津

次韻才仲山行

幕府文書一掃空何妨行樂醉春風  
想聞笑語千山外

正在烟雲萬疊中  
呀日鳥聲喧細碎  
照溪花影靜玲瓏  
苦吟只恐凋肝腎  
夫子還宜少黜聰

與神智師話別

昔我年始壯  
託身靈鷲峰  
主人大導師  
鼓舞揚真風  
四方依絳帳  
雜還象與龍  
嗟余於此時  
已識大士蹤  
紛紛論議場  
頭角出羣雄  
如何三十載  
慧刃藏其鋒  
端居肄業地  
了不為世通  
邇獨念西湖  
聿來將誰從  
情隨山水遠  
興與魚鳥同  
平生方外姿  
自在如冥鴻  
明朝復回首  
飄飄

灑一孤蓬

暉暉堂

堂上何為絕點埃  
堂前翠第掃空階  
遙憐薄日暉暉靜  
影入高人燕坐懷

次韻嵩陽陳叔易先生見訪

知君挾冊未嘗閒  
一志端能事孔顏  
千里扁舟下吳會  
眼中收拾只溪山

枯槁長專一壑閒  
權豪殊未少低顏  
風雲他日超騰去

莫畏移文到北山

曉霽

雲擁茅簷水拍渠  
曉來新雨過吾廬  
鶯紅宿草芳苔滿  
解事長揚自掃除

次韻龔堯佐帳勾晨起感懷

造物紛紛自變更  
達人何用校前程  
芭蕉身世榮枯久  
蝴蝶夢魂來往輕  
隔屋相驚銅漏盡  
開扉猶愛玉繩橫  
應嫌百吏鳬行進  
簿領文書與案平

遠齋為玉上人作

君不見崑崙之河與天通源深發遠人莫窮回溪轉壑  
隨折衝末勢演溢流於東東溟無旁下無底浩蕩足以  
家魚龍嗟哉吾徒雖好學詎肯著意推所從淵停富瀆  
有若是孰謂世上無英雄法師名齋意且遠張皇幽眇  
見爾聰西來竺書五千軸期子歲月如磨龍離騷楚辭  
亦漫讀言語黼黻何必工禪餘習氣如未盡時倚澗石

吟松風

懷仙閣

瀛洲仙人騎皓鶴珮玉鳴風度寥廓錦溪南望九仙峯  
笑指烟霞慙層閣閣中清絕無纖塵銅鑪著香夜夢真  
平明跨鶴出山去澗草巖花空自春山僧問我入何地  
今作玉皇香案吏挾持造化幾時還搔首臨風聊一喟

華亭道中

白水茫茫天四空黃昏小雨濕春風五更百舌催殘夢  
月到官河柳影中



同周元翁著作作范明遠秘校西湖夜泛各賦一首  
薄雲疎雨作還休白帝撩人巧變秋天地此身均逆旅  
江湖幾度共離憂暮聲斷續鐘連磬夜氣浮沉浦與洲  
圓嶠方壺吾未羨敢煩騷客為冥搜

和元翁

高論每逢賢友生還如講武得奇兵了無鄙吝胸中物  
尚有風流世外情破海玉蟾初未躍灑空珠露已先傾  
回橈轉舵行三鼓始見波瀾百頃明

和明遠

二客風神瑩石泉  
鮮衣同緩夜歸船  
已殘巾子峰頭日  
猶認吾廬竹外烟  
水怪有名殊未見  
犀燈無事不須然  
月明幽渚薰葭靜  
珍重沙禽穩睡眠

次韻月上人秋夜見寄

冥鴻振想鷺儀形  
數日新秋入夢清  
丹壑流泉依舊否  
碧崖叢桂幾時生  
風來玉戶涼初集  
露泣銀河色漸明  
鼃勉酬君無妙語  
夜光魚目愧相并

送遠上人還金華

千林脫葉送殘秋一舸南歸興莫留  
富渚江平非白馬子陵灘穩異黃牛  
吟懷覽勝宜無倦才力如君豈易求  
他日殷勤為細字盡傳佳句到東州

宿天竺

夕陽山氣謁蔥蔥路轉松陰覆幾重  
行過石橋人未見數聲先聽寺樓鐘

稽留峰北好林泉珍重幽棲得所便  
柏子烟中能宴坐

想無餘習可攀緣

霜壓簾櫳露泣條  
銀河影轉斗垂杓  
清言共失三更夢  
錯恨芙蓉漏易消

晨起

玄鶴驚呼曉樓鐘  
動翠微楓林墮清月  
疎影亂人衣  
喜不群不疑見訪

鵲啁庭梧喜滿懷  
懸知二子下崔嵬  
山中爽氣知多少  
半逐風流杖屨來

送桐江明上人之都下

窈窕孤雲下翠岑  
帝鄉閑去本無心  
紅塵滿眼急回首  
莫遣空山鶴怨深

送定上人還會稽

西風警羣木  
蕭瑟散秋聲  
病客有歸思  
孤雲無戀情  
月當千里共  
人恨四難并  
苦學誰如子  
他年在一鳴

次韻劉蔡仲秀才雪後登竹閣

檻前君子舊虛心  
雪後相看意更深  
暗日暖風吹鳥語

翠梢高處嘯柔音

君看楚嶠聳巔巔  
圭壁千層間翠嵐  
山後一峯尤秀拔  
依稀還落剡溪南

次韻黃仲閔主簿見訪游寶雲諸寺

吾廬附層阿松竹蔚行路  
平生土木軀羞為折腰具  
蓼虫甘苦澁雖死那求遇  
黃香諸父賢傾蓋有如素  
相將山水行所適得佳趣  
觀臺深且靚縞壁懸清句  
雲巢倚空端下覽宜細顧  
樓臺霽雪初碧瓦塵未浣  
籃輿指顏

景長揖還辭去，恍如山陰集。俛仰已成故，重來竟何時？  
相望碧雲暮。

蘓世美夫人挽辭

夫子剛中早，數竒閨門高。節聳當時淵，明晚欲歸三徑。  
德曜能從賦，五噫不見萊。衣華髮事空，驚薤露昔人悲。  
故知造物酬陰施，玉立諸郎富白眉。

重居夜坐懷蘓伯達昆仲

狂風吹林聲，怒號隔垣洶。洶如秋濤夜來，稍覺群動息。

星斗挂簷霜月高東隣書生勤且勞粲然文彩真鳳毛  
遙想下帷應未寢短檠相對課離騷

慕容居士雙楠軒

陽羨溪山名浙右氤氲淑氣無時有遂令比屋慕絃歌  
甲第殊科爭捷手先生讀書三十年數竒不偶真可憐  
閉門陋巷聊自隱簞瓢屢空心晏然南軒前頭兩佳木  
先生撫玩長不足尤愛薰風五月初白銀開花光照屋  
故人解后相逢遇指點婆娑索新句君不見少陵壯叟



有長吟莫作凡材等閒賦

次韻蘓端定武雪浪齋

孔明氣宇白玉溫忠義勇決踰玉尊葛巾羽扇傳號令  
塞垣徹警無塵昏良辰往往挾將佐射雕走馬循烟村  
歸來飲酒坐堂上賓從如雲填戟門一朝郡圃得奇石  
雪浪觸眼驚神魂旁求蒼珉琢巨斛偃然卧土知無根  
三牛曳歸置堦圯錯磨不許留纖痕興來作詩寄臺閣  
雄詞妙筆爭考論將軍今謫窮海外會見義娥窺覆盆

殷勤寄與朔方客佳致勿毀宜長存

無為堂

無為豈不動無念非剗心至人均道妙與物相浮沉青  
銅一寸明萬象了自分何須苦機械擾擾亂冲襟晴窓  
裊馥篆衣裊蒙餘薰超然曠士懷所得踰古今

示法穎

兒曹汝既識薰蕕卓犖應須力自修一志徑從齊客語  
萬端無受楚人咻卑飛燕雀宜深遠高舉鸞凰可並遊

莫負謫仙當日語十年名譽滿東州

清聚軒

之子喟懷欲稱情故穿幽沼溜清泠倘逢來客議深淺  
但道淵源通北溟

次曉師見別欲遊京洛

春波漲南浦霽色媚澄鮮扁舟駕兩漿行矣子所便岸  
花開迤邐紅紫交相妍詩情發浩蕩輸瀉萬壑淵清新  
逼庾信雅健追樊川相傳得鴻鵠翔集固超然衣袂暫

塵土他時洗雲泉幽姿復炯炯不羨玉池蓮

游徑山懷司馬才仲

柔桑蔽野麥初齊布穀催耕雨一犁畧約時橫溪上下  
薔薇間發水東西重尋勝處追前賞無復斯人手共携  
回首春風增感慨綿綿黃鳥更悲啼

雲巢

環湖相望百招提高棟層軒亦屢躋未若道人基構勝  
闌干清與白雲齊

九江秀色可攬結謫仙愛彼巢雲松寂寞風流三百載  
此軒竒觀躡前蹤

碧瓦朱甍冠翠微鬱葱佳氣繞窓扉人間塵土紛阡陌  
不到藜床燕坐衣

清明日湖上呈秦少章主簿

水邊花霧曉氤氲春入西湖兩岸深冶葉倡條他自媚  
朽株枯木我何心鞦韆索轉朱樓角博塞聲喧碧柳陰  
年少故人方感慨未應從俗強浮沉

時少章  
喪耦

送誠無上人還洞山文禪師席下

上人妙齒遺樊籠嗜好豈與稠人同巖棲水飲有餘裕  
期以至道超鴻蒙少林人正僅千載末路鼓舞誰為雄  
西江老褐真望士蟻趨雲合爭所從羨君服役事且久  
誠專志苦迷春冬心珠磨錯稍精瑩彷彿水月含冲融  
去歲扁舟下吳會溪山勝踐情所鍾芒屨竹杖霜露入  
始知節物徂秋風朝來興盡挽不住飄然又逐南征鴻  
他年相逢定廬嶽與子終老巢雲松

燕默堂

萬彙乾坤裡誰何識道真  
喧卑憎末俗燕默羨高人  
漏轉芙蓉永香銷栢子頻  
他年揮玉塵堂上挹芳塵

送嚴上人還永嘉

道人出處孤鴻傳詎肯低回受羈絆  
飄風轉日歷九州不羨騎鯨遊  
汗漫我生與君幾相逢窮幽摘腴時乃同  
胷中妙道未容扣又引高興辭秋風  
君家住在孤嶼側此別何時見  
顏色欲識相思一寸心冷月依依挂空碧

吳門獄中懷北山舊隱 六首

江湖堂北是吾廬  
繚繞杉篁蔚有餘  
欲問山中近消息  
鱗鴻不寄獄中書

誅茆投老卜栖遲  
雲雨相翻豈易知  
夜鶴曉猿休悵望  
回車復路可無時

數畝檀欒古道邊  
亭亭氣槩上參天  
未應霜雪能摧抑  
不用行人嘆可憐

東崦扶疎一樹梅  
繁英辜負歲時開  
殷勤寄語蘭蕙



他日春風我亦來

甘冷宜茶石縫泉得名初自玉堂仙  
蒼苔滓穢聊疏治  
照月涵星復粲然

一徑綠雲入壽星竹間窈窕見疎櫺  
闌干數曲觀臺上  
幽草靚花常滿庭

吳門懷錢塘何彥時仙尉

英妙何郎蘊德光不隨人世事炎涼  
麒麟步武開天上  
他日青雲道路長

英游閣前官柳行柔枝嫋嫋弄鶯黃多情春色還依舊  
獨有離人天一方

湖岸茸茸細草生芳洲杜若想縱橫去年問柳尋花地  
誰伴穿雲渡水行

劉咸臨秀才挽詞四首

道源學士之子

劉子江南英韻勝不友俗閉門誦詩書戶外無來躅昔  
我寄匡山巖扉屏幽獨君聞跨蹇驢迢迢訪深谷忘懷  
去畦畛結好比松竹浮雲事忽空逝水難再復徒有篋

中文千秋成鬼錄

異材擢陽阿秀色方蔚然侵尋掩衆阜屹屹上造天驚  
飈忽摧殞中道虛棄捐顏淵古稱天道德今獨妍何求  
擁腫為無用徒永年

平生本家學恥作干時語著書以愚名綽欲慕前古紛  
紛詆迂濶默默君自許弱齡詠風騷其詞哀以苦先生  
歎竒作壽達終難與果為冥冥遊一往不可覩

吾希李長吉異代不得友賴餘錦囊篇把玩時在手斯

人君並駕未易較先後肝脾畏陽秋落筆粲瓊玖當年  
解后初宛在三峽右相携石橋行下瞰氷雪溜音容俄  
永隔山月空依舊銘詩得黃香知子垂不朽

贈霍山人

先生少年喜武事三畧六韜曾徧閱胸中雲夢吞八九  
氣勝萬夫真勇決防邊伊昔從都護欲取功名繼前烈  
臂弓腰箭事戎裝遠出沙場恣游獵擒狐射雁狂且逸  
不覺歸途迷夜雪敗官遭譴失所志回首飄然辭魏闕

挾持妙術當生涯放浪江河閑歲月尋常得錢即沽酒  
笑與妻奴同飲啜樂天知命了無憂奕奕紅顏浮兩頰  
春風浩蕩魯城邊稠花亂蕊爭紛妍方將與君共携手  
騁懷游目相回旋興來別我汶陽去黃鵠一舉難留連  
村橋野店醉斜日路人誰識地行仙

參寥子詩集卷八

欽定四庫全書

參寥子詩集卷九

宋 釋道潛 撰

送劉不已推官罷奉符尉入都注擬

少年讀書破萬卷河朔聲名壓諸彥詞場百戰功不成  
晚得青衫非所願白頭況有北堂親斗祿強須甘冗賤  
三年一尉泰山下簿領區區事弓箭追窮寇盜走山谷  
肯為風霜辭怯懦要功異賞本無心脫去僅能逃所譴  
草枯蓬斷歲將徂結束行裝抵京縣達官貴吏急賢材

一鷄君須預論薦投竿舍筴去作相解后風雲一朝變  
造物於人自有時未足為君生忿怨

過彭城觀陳傳道知錄所藏東坡公畫

枯枝瘦石兩相望南北悠悠徑路長  
卷盡平岡三百里風枝雨葉更飄揚

淮上觀水

桐柏崑崙日夜傾役溪注壑本無情乍為含垢千尋濁  
不作矜人一掬清



戲書誠師秋景小屏

黃蘆敗葦兩三叢  
彷彿江湖在眼中  
雁鴨驚呼綠底事  
一時昂首立秋風

過韞秀堂觀仲豫二詩因次其韻

箕南斗北各殊方  
誰信相思去夢長  
蓬斷草枯常歲晏  
寥寥空對蕙爐香

荆溪一別十年餘  
流竄何嘗定所居  
等與山河同幻質  
更將三界作蘧廬

次韻聰師見寄

三年東魯貶閑戶寔超然靜極通幽眇神游豈間焉獨  
全霜後操未異火中蓮不似沉湘客徒懷忿與悵  
夙學誰知子源流務所滋風騷追五柳禪寂擬長髭桂  
魄元昭晰浮雲自蔽虧險夷終一節吾以古為師

次韻升師見招

老去年光知幾尋無端華髮苦相侵獨憐碧眼平生萑  
未改青松一寸心欲扣禪關當歲晏肯愁溪路隔雲深

相逢試探梅花信應有香鬚擢碎金

兒童牋管已能操書之吟窓幾兔毫文圍垣墻增漸廣  
詞林枝葉勢方高嗟余舊喜論周詰晚歲無心諷楚騷  
羨子得時勤述作宛如秋浦漫雲濤

殘菊

霜摧露殞萬枝空叢菊鮮鮮尚見容細藥冷香聊自媚  
無心引蝶更勾蜂

滌軒

隔雲穿竇引涓涓噴玉跳珠亦可憐心垢本無何用滌  
戲將瀟灑度流年

千頃解院觀司馬才仲遺墨次韻

濛濛春雨暗村橋竹裏禽啼婆餅焦度谷勸聞車軋軋  
穿林愁聽馬蕭蕭細窺陳迹僧坊靜默想風流鄙吝消  
浮魂沉魄今已矣無人為作楚詞招

唐昌王悅道桃竹軒

餘杭門西山迤邐屹屹千峰挿天起窮幽摘勝過三邑

隨處雲林皆可喜  
邇來杖策到君家  
始覺溪山逢骨髓  
爭流萬壑會目前  
競秀千巖對窓几  
丹楓洗雨秋霽餘  
白鳥出沒嵐光裏  
主人韻勝無塵埃  
翠竹紅桃相映栽  
良辰樽俎憑誰共  
友月朋雲自往來

溪上

紅蓼叢邊雙鷺飛  
波痕翻動碧琉璃  
須臾相趁却回首  
斜立垂楊烟外枝

聽盛道人琴

陰雲收雨閣層簷寂寂西風不動簾燒盡夜堂紅蠟炬  
高山流水聽無厭

有客浮游不定家玉琴三尺當生涯從來正始無人會  
掉首高歌烏帽斜

千頃山圓鏡堂呈應禪師

茲山嵯峨冠天下一徑縈雲行兩舍始窮絕頂見招提  
碧閣丹樓屹如畫門前池水瀉蜿蜒座上風雷驚晝夜  
峨眉五臺誇壯觀品目真不此為亞偉哉南師非世人

開荒闢土初椎輪寥寥相望三百載廢興一一難具陳  
丹邱大士來鼓舞氣象煥發重增新投金輸贐走南北  
法雨所被無涯津虛堂選勝得佳處隆簷巨棟成逡巡  
窓扉洞達舒兩目異景錯出羅綦綦朝雲夜月常萬頃  
寒光炯炯如鎔銀堂中隱几人何似湛若玉毛懸秋旻榜  
名圓鏡示來客庶使方寸無緇磷

沈道原養浩堂

塵勞萬計日紛紛未礙堂中養浩心花草暗香來屋角

溪山爽氣入衣襟樽中白酒無時有篋裏清詩不廢吟  
夜夜鄰家助幽致數聲羌管弄微音

宣上人玉淵堂

玉淵悶蒼崖源深杳難測但見涓涓附籜龍宛轉來投  
小池側小池方折餘兩尋鼃黽不游苔不侵青天無雲  
落寒影沈柔見底空人心妙哉支公營小築氣象蕭然  
真不俗夜吟朝講度流年何用崢嶸誇傑屋

與定師話別六言



客有來從東越示余滿把瓊瑤萬壑千巖鍾秀故知多  
士翹翹

雪解松筠振色氣回蘭蕙含芳興動剡溪吟客夢先歸  
鳥飛翔

山海濤雷方震橫江雪陣如山一葉舟輕飛燕飄然掠  
水東還

鳳唼山含暮靄西陵月破黃昏慣作江湖離別未應當  
此銷魂

慧覺孜師綠筠軒

綠筠蕭蕭含爽籟幽姿冷落人難愛壁間但有謫仙詞  
聲名自到江湖外當年叔軒非壯觀局促簾櫳日虧蔽  
一朝經畫有底難推倒牆頭了無礙坐挹西南十里山  
彩翠浮空屹相對開池鑿圃增氣象佳致真為一方最  
鳥聲鳴春春漸融蘭芽蕙茁初蒙茸我來正值新雨定  
弄日吹香聞座中主人散策邀我步池南池北聊從容  
會待龍孫添夏蔭借君此地眠清風

夏夜智果懷武康令毛澤民

暮聲寥寥殷上方  
籠紗朱火影微茫  
窓虛竹淨雨初闌  
雲潤星輝夜更涼  
落枕松聲驚瑟瑟  
撲簾香霧靄蒼蒼  
遙憐散髮東堂老  
正卧風漪六尺床

澤民自號東堂老人

寄宗室趙伯言朝請

趙侯天人裔雅韻能拔俗  
豈意江湖間解后識眉目  
高談為余傾落落如轉轂  
端無富貴驕但有文字欲交游  
多望士頡頏爭馳逐  
艱難風義高迹與古人續  
銅章領

劇邑宛在江之曲鳴絃陶永日了不事鞭扑新詩擬建安簡遠詞不縟錦囊有餘棄示我僅盈軸持還故山樓把玩時反覆美哉韶濩音鏘然落巖谷嗟余真淺陋學海無一掬仰君東溟深短綆不可觸

讀東坡居士南遷詩

居士胷中真曠夷南行萬里尚能詩牢籠天地詞方壯彈壓山川氣未衰忠義凜然剛不負瘴烟雖苦力何施往來慣酌曹溪水一滴還應契祖師

讀聞復詩卷

詩律久已廢宏綱誰與操  
斷絃那慮續吾黨有英髦  
氣穩侔彭澤詞幽近楚騷  
未輸湯從事獨詫碧雲高

次韻聞復廬山見懷

匡廬三載恣徜徉肯憚衣裘弊  
雪霜學徹死生追  
祭忍力窮騷雅陋齊  
梁心源素與秋潭靜  
定水寧同夏潦潢  
解后逢余舊題墨  
蘇封苔駁不成行

夏日寄愚坦二上人

仙潭從古水雲鄉不羨西湖六月涼  
支港官河通市井採菱拾翠有舟航  
觚稜迥與星辰接鐵鳳疑參鶴鶴翔  
九夏登臨輸二子一時摹寫付詩囊

次韻聞復西湖夏日六言

山水初無今古人間自有沉浮試問行歌野老桑麻用  
事何憂

老葑年來席卷吳儂舊恨彌申昨夜馮夷鼓吹遨嬉抵  
徹諸隣

夜深一碧萬頃彷彿明河接天岸曲風簟成韻絕腴細  
莞危絃

西湖清淺可泛湍險豈類瞿塘隨處荻蒲蓮芡櫛風沐  
雨尤香

南窓寄傲一榻午帳風來岑舒懶躡子雲陳迹解嘲更  
續成書

燒空火雲萬丈氣焰信可流金嗟爾龜魚得計適然游  
泳滋深

櫟杜侵堦美蔭鳴蟬託質初涼熏風正被草木莫作秋  
聲感傷

柱礎爭流餘潤油雲忽改山容定有盲風恠雨曉來已  
聽鼉龍

湖光宛同玉鏡隄柳閱若房櫳六月行人過此未輸仙  
客壺中

河漢斗杓橫七重城漏鼓傳三露鶴一聲何許嘖然震  
響空巖



夏夜偶興

微陽墮層巘，歸翼投空林。  
龕燈閱古殿，梵唄無餘音。  
蒼茲石壁下，徐風散冲襟。  
缺月如斷環，依微挂松陰。  
清暉婉相屬，永夜諧吾心。  
空生大覺中，一漚示浮沉。  
此身漚中客，冥觀無古今。  
昔我嬰世故，紛紛那重陳。  
且求華胥夢，蝴蝶相追尋。

次韻古上人湖上步月

尋常西湖月，雲霧多襲明。  
茲宵實昭晰，似慰詩人情。  
低

昂見列宿戢曜非光熒起余二三子微咏哦新聲杖藜  
山前去雞犬寂不鳴蘭皋宿鷺羣回首時自驚君看南  
北山氣象真崢嶸參差烟樹縈一一含餘清上人江南  
秀解后意所傾夜闌勸復路浩興殊未盈

臨江月上人

率同志為社誦法華經一萬  
部資其梵行作此以贈之

能仁說教滿竺乾流入中國餘五千於中妙經為最勝  
顓師所解尤通玄化行吳會連海壖紛紛得法如雲烟  
見聞讀誦又其次隨類譬率無間焉嗚呼上人志且堅

善邀佛子同法筵妙香炷爐馥旃檀十科勸進追昔賢  
旁行貝葉軸似椽卷舒朝暮往復旋利根微種聊窮研  
魚兔一獲忘蹄筌自餘區區顧未然瀾翻口舌如湧泉  
外物交錯心匪緣功成一朝晚受纏烜如紅蕖濯清淵  
俯仰千聖遽可肩茫茫苦海旁無邊不有舟楫誰能先  
烏蟾疾馳如走丸咨爾佛子無睡眠

瑯琊山茶仙亭呈曾子開侍郎

滁山雖僻左謫宦皆名臣後先聞數公卓然皆鳳麟憶

昨紹聖初謫公俾省循盛德忘怨悵虛懷隨屈信政成  
思覽眺興與烟霞親後車載鄒枚主客驚路人逶迤度  
山谷導從屏所陳漁樵許爭席解后全天真泠泠庶子  
泉味壓康王珍團團小圓月色冠閩山春白足相與飯  
溪毛擷青菁熊魚得兼美樂事無涯津花瓷勸引滿疏  
淪貫百神危亭倚巖阿榜額獨朱新牧之擅風流茶仙  
誇絕倫相望三百載公能嗣芳塵

送錢持王主簿西歸

蘭陵號多士君實名家孫高才  
縻篋庫枳棘棲駕鸞  
旦謝朱墨超然整歸軒迎秋餞  
伏初炎威尚歎煩松陵接蒼  
霄迤邐皆清源舟子宜夜泛  
蘋風生夢魂回塘官柳行千  
樹如雲屯明河挂柳外涼月  
低金盃茲行信有得他日為  
余言

寄子開內翰

天將有作會雲龍一德君臣  
邂逅同表率衣冠真領袖  
羽衣臺閣舊家風詞林豈獨  
專周誥袞職深期補舜聰

四海滯淹公可棄盡教鳬雁集庭中

贈潛照月師

吳興上人心志苦筆研十年耕學圃形癯骨瘦神獨清  
耿若霜鷗立秋浦錦囊新詩殊汗漫妙語間發猶稽古  
銖鋤冗長更磨揉激濁疏清導靈府自然韻勝遺島可  
遠跂淵明追步武瓶盂勸子適四方莫學匏瓜甘墮窳  
崇山廣澤徧游覽始信憑高極天宇藝成技進蔚文采  
楚楚華身竟何補茫乎三界同傳舍而我與君俱逆旅

不如回首依老褐妙精明心求許與鳴蟬委蛻槁壤餘  
脫畧秋風即高舉

垂慈堂木樨花

堂下高花屹兩株繁英碎甘芳巧連茹猛香匪占春園盛  
清烈仍分里巷餘長抱秋蟾滋夜氣偶搖風露墮階除  
根盤厚地知方壯封植何人考厥初此花乃都正慈  
化老師手披之

次韻關子容晚霽

小院回廊明霽霞疎簾未捲尚橫斜應憐碧砌無塵滓

石竹紅薇靚有花

飛簾初遣雨師回  
獨上江城百尺臺  
萬景橫前方領畧  
越山仍欲送青來

再和湖上晚歸

漾舟歸路興何賒  
水樹低涼一道斜  
菱蔓蘼葭都卷盡  
芙蓉炯炯獨開花


雲披霞卷仰昭回  
試望翻經古石臺  
應有秋香生桂樹  
吹風肯傍暮船來



次韻子容同聖功見過

檀藥小徑閱陰陰  
解鞅停驂步更深  
知我山棲久寥落  
故留佳句比南金

桃李君家世布陰  
棣花雍穆義還深  
浮雲百變何須恠  
張耳陳餘舊斷金



參寥子詩集卷九

欽定四庫全書

集部

參寥子詩集卷十至十二

詳校官庶吉士臣汪彥博

侍讀臣孫球覆勘

覆校官中書臣田尹衡

校對官中書臣王家賓

謄錄監生臣陳炳

欽定四庫全書

參寥子詩集卷十

宋 釋道潛 撰

續許元裕夢中作二首

許參議失幼子甚慧方悲惻中卧于北窓下遂夢為

詩覺而記其兩句云未可病中驚老去會須花底喚春歸語甚美而元裕意其子他日必復生

俾余續之

北窓支枕夢幽微  
隱隱神明發  
暗機未可病中驚  
老去

會須花底喚春歸

琉璃雖破彩雲飛  
演慶高門未易衰  
既有嘉祥能兆夢

定須他日產熊羆

次聞復湖上秋日十首

六言

澤畔薰葭蕭瑟露華落日珠浮撫事少陵多感萬端獨  
立懷憂

禪餘偶登絕巘據石聊為欠伸眼界謾分畦畛誰知大  
道無隣

楚客當年何苦愁懷繚轉非舒賴有管城公子離騷萬  
恨能書

西湖發揮有素最盛唯誇樂天遺愛到今不朽長隄一道如弦

處士尚餘陳迹斷碑橫卧林塘婉約梅花秀句騷人萬古傳香

草蔓行將漬茂菊英稍稍敷金南浦愁窺去燕海山蒼莽雲深

江城秋至幾日風物陡覺淒涼隣女機絲何有夜間促織悲傷

人物年來衰謝背繩追曲周容嗟爾得時蠅蚋故能嘲  
哂龜龍

涼月涓涓清媚舒光巧入簾櫳萬籟聲同比竹細窺一  
空中

可怪狙公巧黠猶迷暮四朝三老我身如枯枿兀然不  
動幽巖

觀宗室趙明發使君所畫訪戴圖并二小詩因次  
其韻

水石追摩詰風騷類小山每來窺二妙戀戀欲忘還  
巉絕千峰玉清妍五字詩胸中盤奩氣彷彿幾人知

次韻樓試可承議見招

東州羈旅迹誰親夫子端能給我貧默識松筠霜後操  
靜看桃李夢中春嵩陽勝絕高天下縣令風流邁古人  
待得芳菲開爛熳去隨行樂後車塵

次韻秦少游學士觀宗室大年觀察所畫江干晚

晴圖 四首



數幅生綃上形容萬態心坐窺天下勝何用遠登臨  
漠漠雲披岫班班雨弄晴橫江舟一葉注目使人驚  
陽秋閱肝膈無處見微茫時作丹青戲風流冠帝鄉  
參差山接野渺莽水連空笠釣沙頭客真宜避世翁

春陰

浮雲易作雨無端未放春泥十日乾須信杏園憔悴煞  
從來花骨不禁寒

次韻伯言明發登西樓望桃花

江南梅子已生仁京國桃花始放春氣候不齊雖可恨  
一枝猶得見牆闌

小樓西望那人家出屋香梢幾樹花只恐東風能作惡  
亂紅如雨墮窓紗

送伯言赴姑蘓上幕

都城公子海賢否良難會從容翰墨場班班知所詣超  
然三四公詞學昔人配源流出蘓黃汲引功豈細斯人  
固才華氣節復遠邁一官從幕府未覺簿書礙投匭却

鳬行岸巾依物外凝香久寂寞清絕今可繼初辭廣陌  
塵笑鼓春江柁楚岫與吳山相望挹空際莫唱渭城歌  
臨流增歎喟

贈歐陽季默承議

先公跨箕尾搖曳旋天闕於今二紀餘肯復來人間時  
時對遺編彷彿窺一斑夢寐思見之何從暫追攀邇來  
都城裏忽覩庭中蘭方寸實驚喜典刑斯可觀抱疴一  
榻上骨瘦清琅玕為余設幽几氣貌徐以寬微詞落玉

塵文彩真孔鷹隼華惜未識妙譽聞朝端先公德未泯  
四海共仰歎願言付百世清風嗣門闡

次韻劉延中廷直見贈

劉郎世曹子苦學窮淵源羞為一掬清欲效千丈渾君  
看長鯨質澗壑豈所存操瓢妙述作斧鑿無纖痕鍾牙  
不世出審音誰復論鵷鷺理勁翮雲漢思孤鶩上追鸞  
皇游下棄燕雀喧建安誇七子壯氣君可吞九衢苦昏  
霾槐陰蔽重門良辰為我飯湍淩餘芳蓀軟語夜達旦

未覺罷神魂須知名教樂不羨富貴尊

酬劉巨載舍人見贈所畫山水扇

冰紈玉粉淨無塵墨妙扶疎更絕倫試問揮毫底人物  
不言從可識天真

觀明發畫李賀高軒過圖

唐年茂宗枝時平多俊良長吉尤震曜春林擢孤芳退  
之於孔門屹屹真棟梁筆力障百川風瀾息其狂破衣  
繫麻鞋右顧生輝光一朝與湜輩命駕驚煌煌賀初為

兒童隨父事迎將須臾命賦詩英氣加激昂長安衆詞  
客聲問爭推揚風流垂異代尚想古錦囊君今亦宗英  
韻勝斯人方少年肯事事苦學志獨強風騷擬屈宋  
妙處相韻顏丹青出戲弄配古猶擅場形容示往事彷彿  
如在旁一徑入幽遠古垣繚林莊平橋跨淥水叢薄  
含葱蒼晴窓為披拂佳興杳難忘

次韻東坡居士過嶺

一時遷客盡難堪二老高懷默自甘造物定知還嶺北

暮年寧許喪天南安排拄杖尋廬阜斗數征衣洗瘴嵐  
他日相逢長夜語殘燈飛燼落氍毹

次韻代嶺上老人答

閑將箕箒掃崔嵬夾道松陰盡我栽人去人歸真一笑  
壞空成住互輪回

次韻子由侍郎書事二首

七年依嶺外遇物即防閒宿負初償畢他生豈復還飄  
飄疑鶴侶奕奕藹童顏自許喬松壽玄機密鎖關

真材不易得於國實長城造父還能御驂駒豈憚行買  
田隣少室為計老餘生居士來何晚江淮遣候迎

次韻試可見訪峻極遇雨

都城塵土倦茫茫獨喜西來策甚長避暑禪房依亢爽  
可人溪雨作清涼飛蚊斗絕簷間鬧乳燕時拳砌下簷  
縣令風流真晉客談餘玉塵自揮揚

揖仙亭

崧陽古令尹製錦誇妙手鳴絃對高堂坐使風俗厚政



成思考槃觴豆宴賓友開亭面巖嶺佳致昔未有雲烟  
靄葱朧青壁冠星斗王子果真仙揖君千載後鸞車駐  
縹緲彷彿容暫偶天風吹簫笙淒響落戶牖紛紛驚坐  
客往往為回首相顧弗復言且進杯中酒

次韻試可同遊法王嶽寺

兩山修徑盡榛蕪謾詫當年幸翠輿空觀宸文藏寶構  
不逢衲子話真如寺久無僧林深想見靈根茂地勝宜多隱者  
居涼月照人歸路好傍溪嘉樹影扶疎

次試可喜雨

東阡北陌久黃埃天遣神龍詎用媒  
雲似濤頭山半起雨如銀竹望中來  
奔輸澗谷時頽岸噴激龜魚或曝腮  
民物有秋真可喜池蓮從此更須栽

峻極夏夜

廣庭無凡株鬱鬱兩佳樹扶疎饒美蔭  
盤錯根本固朝披葉底風夜泣衣上露  
禪餘自循繞百匝未忍住月華中天來  
左右發揮素清景非人間冷然洗吾慮  
緬彼大

梁下炎蒸毒朝暮朱門曉未開馬足已馳騫推眉事權  
要幸彼一盼顧素標挿君頭擾擾獨不悟

觀宗室曹夫人畫

野水平林渺不窮雪翻鷗鷺點晴空洞房豈識江湖趣  
意象冥將造化同

華屋生知世曹榮誰教天付與多能西風白草牛羊晚  
隱見橫岡一兩層

臨平山下藕花洲旁引官河一帶流雨棹風帆有無處

筆端須與細冥搜

嘗許作臨  
平藕花圖

次韻陽翟尉黃天選見寄

寓形宇宙間，佚我方以老。  
流光安足恃，百歲同過鳥。  
頃余嬰網羅，文彩綠自表。  
自古山林人，何曾識機巧。  
但記寒巖翁，論心秋月皎。  
黃香十年舊，學術參衆妙。  
虛懷養天和，肯徇奔走鬧。  
官居職事理，晨起何用早。  
桐陰滿西齋，叱吏供灑掃。  
眷余東南來，野飯煮芹藻。  
先生既清尚，令尹亦高蹈。  
相將古寺行，軟語顏晚照。  
公家有畸人，

虛緣能自葆卜築嵩山陽行當從結好山中饒勝境一  
覽未易了何時命巾車共陟雲外嶠翻愁筋力疲不隨  
追勇蹕公詩擬南山雄拔千丈峭形容逼真解后適  
其要藩籬吾未窺敢議窮閭奧

秋聲

古槐花落小中庭夜半風來捲葉鳴頻水先生如尚在  
呼兒應問此何聲

次韻試可嶽祠祭土宿齋

神祠齋館卧耽耽五鼓星河屢起瞻  
劍珮森森趨帝右  
衣冠肅肅奉宸嚴風傳遠壑松千樹  
人擁回廊月一簾  
四嶽旌幢初會散晨烏聲動廟竿尖

贈宗室德強團練

造物賦象質於余頗能名瓊瑤琢其骨  
冲和擅其清公  
生華屋貴好學從妙齡才高豈容遏卓  
然以文鳴厚德  
滋善養雍容無暫矜區區草莽人未必  
真爾能家藏三  
萬軸插架連屋楹牙籤示題目探賸手  
不停微言固澹

泊嗜好如飴錫祖宗開鴻基累聖致太平詵詵既蕃衍  
綽綽亦見稱裕陵喜人物教率從典刑聯翩試文藝議  
論參公卿公材實杞梓落落非杉桧願言勤著書會當  
補朝廷他時樹勲業曩鼎信可銘

哭少游學士

江左有豪英超驤世無倫妙齡已述作識造窮天人儒  
林老先生相與為友賓客來叩治亂亶亶披霜筠波瀾  
與枝葉猶足跨後塵青衫入仕初十手爭扶輪孤嘲可

敵衆志鬱不得信造物念流落薦收付洪鈞干將不  
許就中畫如有神七年投炎荒日與山鬼隣妻孥各異  
土相望同參辰秋風吹黃茅八月瘴霧新回車嬰重厲  
惇惇無與親中原尚杳隔墳隴懷棘薪淒涼浯水頭魂  
逝歸無因精爽竟了了挽章見情真流傳到京闕悲讀聞  
縉紳斯人儻不忘光華國之珍彼蒼未易曉三歎鼻酸  
辛

念子少年日豪氣吞九州讀書知突與游及無金牛當



時所獻策考致第一流論高追賈誼氣勝凌馬周勝理  
非空文灼可資廟謀危根易搖動謂子不好修嗚呼一  
齊人奈彼衆楚咻孔門餘四科士豈一律求區區事屠  
釣崛起為公侯數奇信有命君亦忘怨尤平生所著書  
字字鏗琳球子道決不泯千載傳芳猷

瓶盂客京口彷彿熙寧末君方駕扁舟歸來自苕霅中  
冷忽相值傾蓋忘楚越禪揮龐老鋒辨鼓子貢舌連宵  
極名談江閣倚清絕扣檻出鼃鼃時取一笑發

金山江  
中多鼃

扣闌卽出賓  
客常以爲戲  
邗溝介淮海  
濟濟多俊傑  
良辰苦招要  
結

好從此設堂  
堂紫髯翁道  
德冠前烈

謂孫華老龍圖

風流廣文

先炯炯事修  
潔

謂閻求仁博士

老禪魁叢林  
冠蓋趨維還

謂度顯之

禪師

三豪相繼往  
墓木葉屢脫  
子今復云亡  
枯棋愈殘缺

相逢舊好間  
悲詫那忍說  
明年東下船  
繫纜竹西月  
若

真蜀岡南彈  
指當永訣

次韻天選寄  
逍遙庵黃居士

收得詞場舉  
子身拂衣高  
卧傍嶙峋休  
言白日壺中  
勝

且看紅顏鏡裏春富貴羣爭雖有路山林獨住豈無人  
恐君未識陶彭澤故約籃輿訪米真

次韻試可同謁子晉祠

古柏連岡三萬株朝烟破日翠扶疎投鞭下馬得幽徑  
共謁賓天帝子居

遺榮少海徑無雙便逐浮邱出帝鄉可笑而今居富貴  
亦思高舉上蒼蒼

參寥子詩集卷十

欽定四庫全書

參寥子詩集卷十一

宋 釋道潛 撰

寄王晉卿都尉

主第耽耽冠北城，位居侯伯固尊榮。  
肯將踏月趨朝脚，來伴穿雲渡水行。  
池上紅渠應漸老，山中紫笋尚抽萌。  
嵩陽迤邐川原勝，聞說他時卜釣耕。

與田承君宗丞話舊

赤日下西谷，松門歛餘暉。  
蕭蕭征馬鳴，客子來者誰？故

人田子方六月并州歸崎嶇千里道問子來何為君命  
不俟駕詎敢辭炎曦禪庭梵唄歇軟語同遙迤梧桐挂  
涼月清潤含裳衣人生實萍梗同附一渺瀰驚風或暫  
先波定還相依昔我在南充識君英妙時軒軒勇氣節  
凜凜如熊羆聲名固已早時命殊淹遲今茲向魏闕驥  
足將騰夷聖君隆至治諫諍求瑕疵嘗聞至人語子可  
補拾遺一言開堯聰四海風俗移無為外重失蹇諤當  
自持贈言古者事吾豈忘前規

登嶽頂呈試可邦直

偉哉中國擅五嶽巍巍嵩高據其尊四時百辟盡朝會  
雲幢烟蓋來追奔自餘衆阜何足數擾擾羅列真兒孫  
秋霖乍開原野淨隆曦破海浮朝暎淵明曠達不事事  
勝日結客遊山樊山腰下馬躡風磴杖履詰曲躋巔岼  
窓經玉女援鳥窠石漱飛瀏鳴潺湲長松吟風和哀響  
肌膚凜栗淒神魂行窮絕頂已晡側雲烟為我開餘昏  
昂頭去天驚尺五星斗厯厯俯可捫超然擬與人世絕

彷彿有路通崑崙洛陽奇峰三十六領畧併入一眼吞  
平生方寸喜壯觀茲游氣豁殊軒軒二豪詞筆有餘地  
請賦傑句留山巔風流便可付千載歐梅尹謝相與傳  
送王彥齡承務還河內

武陵王郎高韻度鞍馬四方無定住眼逢泉石便吟哦  
咳唾珠璣不論數我亦悠悠事不羈浪萍風梗隨安之  
少室山前古蘭若解后便與同襟期興來岸幘一長嘯  
清聲邀越穿雲嶠竹林故事獨未泯人物如君亦高調

秋風獵獵促鳴蟬歸路千山入馬鞭  
白袍烏袖宜圖書  
不羨襄陽孟浩然

寄宗室周臣觀察

帝胄天孫多茂良似公人物更難方  
詩書自負青雲器  
風月能收古錦囊  
科斗雷文陳几席  
鱗衣蟻食耀杯觴  
都城解后傾遲素  
松少歸來一夢長

題宗室公震防禦畫後

錯莫江雲結暝陰  
歸飛宿翼半浮沉  
毫端領畧無遺種



想見雍容物外心

薰葭照雪含餘潤古木攬天氣老成山谷不來居士死  
何人為子一題評

同趙伯充防禦觀東坡所畫枯木

經綸志業終不試晚歲收功翰墨林偶向僧坊委陳迹  
每經風雨聽龍吟

蕭然素壁倚枯枝行路驚嗟況所思惆悵騎鯨天上去  
却來人世恐無期

大年觀察許作從駕出南薰門雪霽圖因以詩督之

南薰門外照初陽  
寶馬雕鞍從玉皇  
千丈雪雲開遠野  
萬枝瓊樹鬪新粧  
筆端妙處君先得  
老去閑情我未忘  
乞與山林資玩好  
高懸素壁爛生光

與廖明畧學士賦餘干縣白雲亭一首呈吳明府

白雲翔太虛  
時來傍孤城  
超然此榮觀  
常恐鸞鶴迎  
能賦自疇昔  
騷人遺典刑  
嗣音竟有屬  
異代逢淵明  
揮毫

無停綴臨流有餘清光風轉洲渚爽氣生軒楹况復廖  
常州吐辭皆正聲跂予浪續貂坐想徒搖旌

賦王立之承奉園亭十首

大裘軒

經綸志四海齟齬不得申大裘縱千丈姑覆洛陽春

載酒堂

子雲草玄時載酒客常滿君今慕若人竹戶誰來款

漱醉亭

潭潭百尺井汲引鳴飛瀾驚回午醉客一漱齒頰寒

介庵

一庵容宇宙介意安在哉珍重庵中人空洞無纖埃

頰有亭

君家十亭觀棊置宛相望是中富墨妙偉哉蕪與黃

亦愛亭

扶疎蔭佳木五月風來徐淵明方偃卧亦是愛吾廬

永日亭

長安富貴人歲月馬上遷岸巾怡永日心事獨翛然

求定齋

南華鑑止水炯然見鬚眉夫子果能定物豈逃妍媸

冷然齋

虛室晝生白清風襲衣屨圓蒲燕坐人冷然欲仙去

賦歸堂

王郎英妙年功名固堪勉浩然賦歸歟持操真可羨

送慈義偈師游嵩少

道人家住錦溪頭  
衣祴常含爽氣浮  
偶踏塵埃經北闕  
却尋雲水過西州  
水銷陰壑蘭芽動  
柳岸長條春意柔  
少室峯前無異路  
莫將陳迹苦追求

東坡先生輓詞

造物周千載  
真材得豫章  
經綸等伊呂  
辭學過班揚  
德厚傾蠻貊  
名高震虜羌  
數竒終不偶  
難與問蒼蒼  
博學無前古  
雄文冠兩京  
筆頭千字落  
詞力九河傾  
雅量同安石  
高才類孔明  
平生勲業志  
鬱鬱閔佳城

少年持國論不羨洛陽人抗疏忘機駢危言駭縉紳丹  
衷那有謂康濟在斯民竟謫江湖去端居寂寞濱

初復中原日人爭拜馬蹄梅花辭庾嶺甘溜酌曹溪梁  
木傾何速椿年竟不齊靈輶向崧洛行路亦悽悽

一時英俊附門墉兄弟從來號兩龍雄辯未饒端木賜  
題評肯下郭林宗精神炯炯風前鶴操節稜稜雪後松  
無復勝遊參杖履追雲弄月更雍容

羣賢投老竄炎荒瘴雨蠻烟豈易當  
毒氣內全真自葆

鐵心無動亦何妨  
海山出處憑誰共  
蜚叟追隨樂未央  
準易著書人不見  
微言分付有諸郎

羽扇綸巾擁帥權  
高牙大纛拂雲烟  
初聞父老誦嘉語

綽有風流似昔賢

定武人謂公下車  
施設宛如韓魏公

謫籍數年居瘴海

功名無分勒燕然  
空餘雪浪齋中石  
留與邦人萬古傳

當年吳會友名縉

大覺海  
月辨才

盡是人天大導師  
拔俗高標

元自悟妙明真覺  
本何疑籃輿行處  
依然在蓮社風流

固已衰他日西湖  
弔陳迹斷橋堤柳  
不勝悲

西湖新堤六  
橋皆公所創



德政從來主意寬  
奮髯時怒豈容姦  
倘逢大事能談笑  
未必風流劣謝安

峩冠正笏立談叢  
凜凜羣驚國士風  
却戴葛巾從杖履  
直將和氣接兒童

大河當日決澶淵  
橫被東徐正渺漫  
城上結廬親指顧  
敢將忠義折狂瀾

文登五日召公歸  
海市奇觀與願違  
已蟄魚龍能再起  
人間異事古來稀

西湖卷葺拓漪漣十里橫吞碧玉天自謂前身直百傳

至今陳迹尚依然

公生平出處多與樂天同樂天在杭州築堤為政十六箇月公亦如之

臨淮大士本無私應物長于險處施親護舟航渡南海

知公盛德未全衰

鄒至完言在嶺外嘗聞人傳慧州太守方君家人素奉佛一夕夢泗洲大

聖來別云將送燕某過海遂詰之曰幾時當去荅曰八日去矣後果如期公得命移儋耳至完始末信後遇方君問然之信

畫圖雖未上凌烟道德芬芳滿世間遼鶴已歸東海去

列仙風骨若為攀

孔子韶方平與其姪處度相訪于香山作此詩以  
贈之

洙泗芬芳遠高材尚可求二難俱韻勝小阮更風流語  
歎時容接詩豪未易酬平生喜人物解后此相投

孔平子書閣所藏石菖蒲

寒溪之濱沙石之竇產之靈苗蔚然而秀有美君子採  
持而歸文石相并涵涵清漪根盤九節霜雪不稿置之  
幽齋永以為好

送處度赴試

異哉曲阜幾世孫白玉受性良且溫詩書禮義祖家學  
擾擾自餘何足論良辰往往專吟誦遠壓曹劉攀屈宋  
肯與齊梁作後塵秋月春花恣嘲弄我方杖策過西州  
指點雲山結勝遊已有詔書催去興豈肯泉石更淹留  
征車曉送登長陌月沒參橫河漢白期君安穩上龍門  
不怕臨流遭點額

次韻李端叔題孔方平書齋壁

萬事年來即罷休  
心縈雲水尚追求  
草堂早晚投君宿  
紙帳蒲團不用收

菊叢稍稍敷金蕊  
蕎麥芄芄放雪花  
榆柳繚牆蒼靄密  
誰知中有隱人家

白頭幕府尚崎嶇  
南畝歸休盡早圖  
漁上山川要佳句  
安排風月待相如

舍南舍北盡雲山  
此處躬耕有底難  
社飲雞豚好隣里  
一盃相屬百憂寬

馬蹄逐逐走埃塵官府寧容自在身  
夜宿南溪孔居士  
青燈相對話悲辛

愛君簷外蕭蕭竹翠幹扶疎一樣齊  
莫道此君無俯仰  
驚風墮雪亦須低

端居終日少逢迎佳客時來一座傾  
不見諸郎事絃管  
幽窓惟有讀書聲

肝膽未應分楚越高曾元共水雲鄉  
方平五世祖  
避亂居錢塘  
愛君善

作離騷語清警殊非俗肺腸

仲尼道德高千古老子微言冠百家餘澤風流俱擅美  
那云玉樹倚蕪葭

吾黨從來迹易親只緣同是箇中人漁川魚鳥渾相識  
來往沙頭肯厭頻

行歌亭孔寧極先生所居

自古山林浪得名欲要人爵謾逃名惟餘漁上行歌者  
獨免移文勒戶庭

先生本自負經綸志在邱園世莫親不信請看門下客

盡為金馬玉堂人

故相范忠宣韓持國滕達道王仲儀諸公皆禮敬甚

嘗聞箕顙卧巢由振蕩高風冠九州欲識當年孔寧極  
依稀堪與若人儔

漁川滕氣靄葱葱遠訪先生舊隱風說禮敦詩見猶子  
故知餘澤未終窮

次韻孔處度李榮期同遊汝陽城西等慈寺溪堂  
汝陽介崧洛郡邑古且幽出郭纔數里招提據清流千  
章鬱古木中有百尺樓循梯到朱欄眼接萬象游二豪



俱才華筆力勝九牛佳辰同覽眺高懷肯悲秋  
軒渠發笑語繚亂驚鳬鷗平生讀書要取用不假鈎想當援毫  
初應手如見投挹子明月光冷然洗吾眸

次韻方平見寄

黃花弄色近重陽山菓紅藜迴得霜節物撩人興不淺  
交情如子味何長終期霧豹棲巖穴且作賓鴻寄野塘  
他日西湖能過我胡麻共飯煮芹香

寄題南陽劉氏松堂

南陽自古誇雄都山川淑氣無時無中間豪傑相間出  
卧龍光武興王圖有唐昌黎百世士布衣奮起為師儒  
風流異代骨雖朽餘澤尚可濡焦枯劉郎先子挺奇質  
志業文史稱鄉閭詞場較執一不售掉頭便卜溪山居  
朋雲友月終歲事挾冊教子猶區區青松寸根手自植  
氣槩今已凌凡株虬髯龍甲拂天籟颭若風雨來江湖  
悲哉孝思論罔極新構永與甘棠俱西州騷人競與賦  
盛事相詫無賢愚續貂自昔人所誚詩成出袖增躊躇

同韓子蒼游黃山觀約高壽朋張公碩不至

駝裘躍馬去翩翩一舍逡巡箭脫弦仙事未須窮傳記  
滕游聊為好山川寄林絡石驚寒瀏繚白縈青對篆烟  
惆悵能文二三子操觚安得共周旋

子蒼見和二篇再用前韻酬之

涉世伊余實強顏傷弓因翼尚驚弦論文已失李太白  
採藥行尋葛稚川請置黃公新石研此山出研歸磨潘子古

松烟幽窓寫就經綸志他日風雲去幹旋

次韻王潛翁題王孝孫所藏摩詰聽松圖

輞川奇處固難評，眼裏瞳人要自明。  
落落信為霜後操，蕭蕭那慮世間聲。  
忘言我已輸三士，妙曲渠寧羨九成。  
此去黃塵沙漠底，時時開匣覩餘清。

時孝孫有塞上之行

遊葉城韓氏東園

曾臺累榭蔚相望，古木連雲出繚牆。  
可但陶朱能計畧，須知猗頓亦材良。  
松風菊露滋清夜，楚舞吳歌奉宴觴。  
好在諸郎俱挾冊，起家儒術未應忘。

過張公碩廷直息軒

公碩乃張施州仲謀子此軒實黃魯直名之

涪翁六藝學力可當萬人施州亦英特文武備一身風  
味真頽頽宛然喜相親詩壇嘗屢戰妙譽傾縉紳涪翁  
往描遷風義頗凋淪施州奮不顧伏臘賙且勤霜雪槁  
羣木凜然見松筠施州歸夜臺遺編照青春嗟我獨不  
識覽卷徒悲辛有子紹門戶飄飄氣方振能文得父風  
作語殊不陳流源日疏鑿豈易量涯津結廬依通衢臨  
墻開蹄輪頽然小軒上息偃全天真男兒功名志蠖屈

終一申誰能効急急俯仰車馬塵涪翁為子名高意  
庶可循

參寥子詩集卷十一

欽定四庫全書

參寥子詩集卷十二

宋 釋道潛 撰

靜舍與蔡秀如承事會話

浮雲無根蒂合散不可拘忽然隨高風千里各須臾吾  
生共天壤出處良亦如憶昔淮水濱與君傾蓋初翹翹  
兩弟昆文彩照水壺門闌本世胄折節勝寒儒扁舟倚  
高岸為我飯伊蒲清談落犀塵鄙吝驚掃除一別今四  
載相忘寄江湖竭來過汝潁弔舊投生芻黃緣訪山水



歲晚倦回車蕭蕭古寺底彷彿日已晡聞君戶外音倒屣迎前趨胡為乎來哉吏牒頗馳驅高材困所役何似林間擣清寒凜敗屋猛燄焚枯株胡牀坐相對氣貌溫以舒明朝各異縣那得同遽廬無煩歎離索且盡一笑娛

贈耿純叔秘校二令侄

高門知積慶堂上有諸郎禮樂非童子詩書見義方  
經營羞弱闕騰踏羨飛黃富貴由勤苦五車安可忘

讀子蒼詩卷二首

蜀國奇男子能文到古人  
淳源稽大雅妙曲和陽春  
節物驚搖落僧坊斷四隣  
看君新著述時與短檠親

大冊雄文未許窺百篇先  
讀海陵詩疲駕伏櫪空驤  
首飛兔流星作麼追

贈賢上人

恒山道人棄妻孥壞衣祝  
髮從浮圖愛纏欲網豈易  
脫慧劍劃斷真須臾飄然  
雲水出鄉國力學生死來  
東都

心猿意馬就羈束肯逐萬境爭馳驅回看舊事真一夢  
清渭濁涇良自殊楚山歲晚俄解后雪屋對語依圓蒲  
勸子南遊下吳越小航短棹尋西湖我家住處湖岸北  
如掾翠竹森千株竹間扣扉試訪我定有猿鶴聲相呼

次韻高壽朋殿直喜雪二首

壽朋乃宣  
仁曾孫

俄頃風雲變物華撒鹽飛絮鬪輕花只因陋巷無貧者  
玉戶瑤階共一家

挾風穿箔打窓紗窓裏人看窓外花噴玉流珠君豈羨

從來自是五侯家

書申正己秀才所藏雀竹圖後 二首

荒園古澗雪溟濛  
細竹枯條共一叢  
寒雀喧饑正無賴  
輸他孔翠食樊籠

樊籠得食暫時優  
身世經年類楚囚  
何似東阡與南陌  
暖風晴日恣遨遊

過韓氏莊登小閣 二首

繚牆千堵氣雄深  
小構亭亭出數尋  
刈穫一空雲水白

闌干注目見遙岑

玉秀蘭芬好弟兄  
時來挾冊視田園  
困場古木千章合  
彷彿秦人避世邨

鄭元規秀才內樂庵

陳叔易  
命名

內樂名庵誰所擇  
澗上丈人題榜額  
想見風流庵內人  
定非紛華域中客  
紆朱懷金何足誇  
簞食瓢飲真生涯  
了無憂患到心境  
得失雞蟲良可嗟

李榮期秀才杞菊軒

草木助盤飧紛紛固多品精英唯竹萌香軟獨楮菌杞  
菊於其間甘清有餘韻達人忘口體道德自滋潤天隨  
與東坡風味實相近窮通均一致了不見喜愠春苗共  
採擷秋英配蘭紉後先屬文詞金聲而玉振李子妙窮  
經屢遭有司擯奔軍未云怯再舉當決陣開軒植杞菊  
澹泊守定分回頭語世俗未用諂饑困二豪勉躋攀孔  
聖故許進長卿亦何人區區能慕蘭

寄潘仲升秀才

漢唐誇汝南豪傑不隸數山川有靈蓄鬱鬱久不吐適  
來見潘子秀色實眉宇是家賢伯仲學術本鄒魯他時  
俱侍立肯與噲等伍浪為葉城遊解后得晤語異鄉逢歲晏  
越鳥思南舉江湖結後期細與論今古

次韻方平送李南仲赴試春闈

四溟鳬雁集天池十目先看俊翮飛養氣有餘吞大敵  
窮經無繆識玄微塵埃舊服辭阿緡雨露新袍授楚衣  
拜命還家春尚好桃花流水漲漁磯

劉福老長官佚老堂

淵明未掛冠志已蹈方外何時辭五斗散髮從傲晚閑  
中氣味好至樂無與對黃香識君心機事勸早計古來  
軒冕事端受外物制有如纏蔓瓜詎肯脫根蒂一朝秋  
風至零落驚潰潰佚老得天和晚景期百歲超然閭里  
間高風邈難繼

贈權上人兼簡其兄高致虛秀才

豫章山川足靈氣天與四時滋萬景翹然雙幹秀一門



儒釋殊科道無異一操經術遊廣文一事瓶盂尋祖意  
功名生死兩俱徹論報君親各無愧上人餘力擅風騷  
三昧何妨間遊戲窮愁肯學郊與島高瞻已能追晉魏  
文章妙處均製餽不放鹹酸傷至味少陵彭澤造其真  
運斤成風有餘地眉陽老人文所宗此語得之吾敢秘  
期君向上踏玄關奔逸絕塵那可改

孫傳師密學輓辭四首

淮海衣冠盛門闥占一時朝廷矜棣萼人物得熊羆暫

倚軒裳貴還隨舟壑移新阡埋玉樹黃霧慘餘悲  
王畿初作邑終日坐鳴絃雅量能知變平戎在未然裕  
陵俄識拔鵬路遽騰騫二十年間事淒涼付逝川  
逸氣凌崧華高標藹縉紳經綸真漢將譚笑却邊塵白  
首遭微譴青雲阻要津功名關造物一語未能陳  
伯仲持哀日余方傾蓋初炷香翻貝葉酌茗飯園蔬一  
作邦溝別空傳桂嶺書升堂揖遺像回首意何如

孫志甫主簿輓詞二首

彼美荆岑玉斯人實可儔眉間見和氣皮裏識陽秋夫

子常稱德蓬山素並遊一官雖不壽撫已亦何羞

君乃華老

龍圖之弟梅子明學士之友

篤學誰如子窮經志亦勤干將曾未試寶氣已沉淪天  
遠終難問眉酸謾自顰佇瞻蘭玉秀褒及墓中身

次韻張敏叔工部題郭殿直遠趣軒

高棟曾軒何用為此軒雖小景無遺惜當麥隴堆青日  
不見波濤卷雪時眼底衣冠多解后胸中貴賤少參差

郭君美  
人倫 問君卜築隋隄上幾見春光上柳絲

蒙泉堂

百尺蒼崖底蒙泉自我名  
瀟涵滋造化汲引絕虧盈  
碧甃深仍固朱欄小易成  
慙懃中夜月長與照澄明

八月十七夜夢中作

夜半秋江不見人  
翠荷擎出露華新  
江神水仙來共飲  
一掬遺我生精神

哭休上人

從來疑造物無處識其真好月難終夕名花不盡青春  
燈空照室白氎謾遺巾泣血憐慈母悲酸動四隣

邃隱堂

雅構何幽渺真宜邃隱名朝雲半峯秀夜月一簾明終  
歲塵氛少無時爽氣清炷香翻貝葉安穩老餘生

寧川西寺水閣呈周格非承議

岑堯畫棟與雲平一派寒流玉鏡清三島豚形方足擬  
千鈞筆力始能名鷗翻翠靄光中去山倚朱欄靜處橫

令尹政閒勤把酒風流未減謝宣城

僧首然師院北軒觀牡丹

鳥聲鳴春春漸融千花萬草爭春工紛紛桃李自繚亂  
牡丹得體能從容琉璃欄玉砌昇曉日輕烟薄霧初冥蒙  
深紅淺紫忽爛熳如以蜀錦羅庭中姚黃貴極未易觀  
綠葉遮護藏深叢露華膏沐披正色肯事天冶分纖穠  
從來品目壓天下百卉羞澁何敢同清淨老禪根道妙  
即此幻色談真空上人封植匪玩好庶敬先烈存遺風

邀芳公子應未耳且樂樽俎怡歌鐘

用法穎韻寄信上人

懷素高閑世罕追君今端與若人期  
龍蛇落紙驚飛電心手相忘豈所思  
驥子神駒天與俊朝燕莫越足難羈  
超然遽作雙溪別肯學紛紛兒女悲

昌化雙溪堂呈府僉判德茂宣德

吳會溪山總可憐此堂雄覽獨能全  
銀河兩派來天上黛色千峯落檻前  
樵斧聲沉蒼靄裏釣竿人立白鷗邊

多才李賀知無敵妙句行看陋衆妍

用法穎韻寄詵上人

吾生出處異周顒猿鶴休驚蕙帳空木笥薦盤非世味  
胡麻供飯古人風時翻貝葉千行偈戰勝詩魔五字功  
杖屨儻來償素約與君同盡此生中

山中書事

身世從來薄所營晚歸邱壑更忘情隨眠煩惱何曾有  
無樹菩提本不生布襪青鞋供我老月溪沙路恣經行



細炊雲子齋厨飯要配香片碧澗羹

次韻孔天瑞秀才見寄

雙溪秋色最關情想見登臨爽氣生  
木落草枯山自瘦潦收沙白水偏明  
眼中舊事烟雲散篋裏新詩早晚成  
來歲如今好時節看君高步躡鵬程

聽天竺慧照師琴

太古淳音久已虧多君妙指善醫治  
高山流水意雖在白雪陽春和者誰  
不放驚飈侵澗戶只容明月侍簾帷

滿堂賓客俱傾耳共失芙蓉漏轉時

寄伯言明發

御城東畔聽鳴珂公子當年為我過  
論議凜然無兩可文章妙絕具三多  
情親意合方傾倒雲散風流欲奈何  
倘附南鴻寄消息吾今蹤跡閔巖阿

過玉師室觀雪川范生梅花

桃李韻塵俗江梅清獨妍  
幽姿有時覩如揖姑射仙  
從來丹青手默數三四賢  
徐熙擅江左趙子名西川  
中間

復誰何絕特推老邊風流迨茲泯范子俄超然廼知苕  
雪勝秀氣常回旋斯人非畫師勢利不可鐫興來即揮  
毫游戲三昧前一枝豈易得荅子能拳拳橫斜有餘態  
肌粉含霏烟我來玩几席歎賞徒留連恨無處士詩二  
妙相並傳

處順齋

生前不用驚毀譽身後何須千載名處順安時真曠達  
本無哀樂動幽情

贈聖可證師

吾道日凋喪末流殊可嗟師門互開闢學者如泥沙欲  
求超然姿駑廐搜渥洼子初為兒童岐嶷衆所誇長能  
遊學海宛轉窮津涯誰知蓬蒿底忽覩挺生麻向來挈  
瓶孟同我棲烟霞朝昏事禪悅神觀靜不譁子今未三  
十涵養滋根芽行看覺苑中綽現優曇花

次韻通守楊叔豐大夫遊狼山

朱轡千騎擁郊垌政暇尋山固有名眼接青蒼心已喜

身經曠野路尤平  
潮吞浦溆渾如海  
蜃吐烟雲謾作城  
欲訪真仙迷紫府  
空端依約步虛聲

吳楚封疆一望間  
時平無事可相關  
樂天標致元非俗  
靈運襟懷本愛山  
蠟屐斜穿橫嶺上  
角巾相對野僧閑  
扁舟却恨南來晚  
勝事風流不預攀

過都監趙思正崇班容膝庵

公子居閒厭華屋  
一官江海辭羈束  
端能有志學淵明  
數坂垣牆營小築  
榜名容膝雅所宜  
寄傲南窓聊自足

祖宗承平逾百年，胷緒蕃衍如雲烟。敦詩說禮不勝數，  
人物似君尤卓然。論文講藝未易料，虛已下士常折旋。  
憶昔初逢大梁下，風味向人如倒蔗。若遭鰲鶴促還山，  
回首相望驚百舍。誰言江路渺雲濤，一舸春風重命駕。  
酬王哀臣朝奉見寄

吾聞終南山鬱茀參斗牛，其下多賢豪學術貫九流。公  
生實異稟，氣奪河漢秋。妙齡升廣文，岐嶷壓上游。登科  
三十年，仕宦真悠悠。功名信有命，富貴豈力求。邇來居

海上未解鍾儀囚高懷素聞道對客忘咿嘸相懽固傾  
倒不可即掉頭今我來自東解后欣綢繆新詩激謬懦  
詞力勁且適恍如聞武庫左右森戈矛便當偃旗鼓罷  
戰為良謀與公從逍遙放浪追子休

觀宗室伯山司戶詩卷

參軍暫輟簿書忙為我聊開古錦囊玉骨已能含秀氣  
珠璣那解不輝光王孫挾策真難事妙質如君豈易量  
他日讎書天祿閣聲名端可繼劉郎

次韻思正雨中偶興

招提岑寂古城隈，海雨江風日日来。但覺園林芳意盡，  
不知紅紫為誰開。花飛南陌渾空柳，綠染中闕

過我筇輿駝褐夜深回

酬趙存道都曹見贈

騷人久無聞，風雅日浸衰。河洲空蘭芷，憔悴無芳姿。參軍  
妙述作鮑謝，相並馳明珠。不自耀光彩，悶陸離。聊因五斗  
粟，暫寄東海湄。官身雖簿領，游又能一麾。寥寥古



寺空轉砌春日遲閉關時却掃寂寂下書帷唐虞悲觀  
覽百氏了不遺論文慎許可紀律嚴自持昨朝發新詠  
落語皆瑰奇世無揚德祖詎識黃絹詞

次韻思正游南寺賞牡丹

叢芳依小院妙色發纖穠綽約宜朝露溫柔怯午風興  
隨懽宴盡事逐斷雲空應待醪醕放招携更與同

贈思正令子

堪愛君家小鳳雛炯然眉目照冰壺他年足逸詩書圃

翰墨場中千里駒

思正挈家游張氏園有詩俾余次韻

邦人莫訝氣如虹  
生長皇家富貴叢  
陶寫年華樽俎外  
吟哦風物笑談中  
伶倫奏出千般巧  
錦彩纏頭一樣紅  
琴瑟獻酬還可樂  
牽衣兒女復相同

維陽秋日西郊

雨洗高梧爽氣浮  
鳴蟬相喚作新秋  
翻空白鳥一行去  
目送岡巒欲盡頭

瓜花零落豈花繁  
秋入隋家舊苑看  
水調遺音今寂寞  
空餘壞道瀉哀湍

潦水初收古澗清  
小橋斜倚數魚行  
神林社日傳簫鼓  
秋稼如雲歲有成

枯榆偃蹇若蒼龍  
影占荒郊半畝宮  
下有牧羊雙稚子  
卧吹蘆管對秋風

參寥子詩集卷十二